



Uunga siunnersuut: Illunut sanaqataaffiusunut taarsigassarsiat pillugit Inatsisartut inatsisaat nr. xx, xx. xxx 2018-imeersoq

(Ineqarnermut Angallanermullu Naalakkersuisoq)
(Siullermeerneqarnera)

Pisariaqarpoq tamatta pitsaasumik angerlarsimaffeqarsinnaanissarput. Toqqissisimaffigisinnaasatsinnik. Angerlarsimaffeqarsinnaasariaqarpugut oqunngitsumik assigisaannilluunniit. Aamma angerlarsimaffeqartariaqarpugut ullutsinnut naleqquttumik.

Nassuerutigisariaqarparput ullutsinni taamaangimmat. Innuttaasut amerlavallaat illuni nungullarnikuni ajorpallaartunilu ineqarput. Inuiaqatigiinni tamanna ajornartorsiutaavoq annertoq aamma allatut ajornartumik arlalitsigut iliuuseqartariaqarpugut - soorunami kommunit suleqatigalugit.

Uani siunnersuummi pineqarpoq nunaqarfinni illoqafinnilu minnerni sanaqataaffiusunut illunut taarsigassarsinnaatitaanissaq tassani pineqarput sumiiffiit soorlu illussanut taarsigassarsititsiniartarfiit aqqutigalugit illuliorfiusinnaanngitsut.

Tamanna Demokraatini iluarisimaarparput. Illut nutaat amerlaneruppata inuiaqatigiinni inuuneq pitsaanerussiaq. Aamma kusanartutut isigaarput nammineq aallarniutissanik katerseqqaartoqartarnissaa tamanna takutitsisussaammat aallartitsinissamut piumassuseqarnermut.

Siunnersuut immikkoortumi pissutsinik pitsaanerulersitsissaaq Landskarsimut akisunerungikkaluarluni. Inatsimmut oqaaseqaatini tagginneqarpoq siunnersuut pisortanut aningaasatigut kinguneqarnavianngitsoq. Peqataanik tagginneqarpoq ataatsimut isigalugu siunnersuut illumut sanaqataaffiusunut allaffissorneq eqqarsaatigalugu pisortat allaffissornerannut oqilisaataajumaartoq. Tamanna pingaaruteqarluinnarpoq inuiaqatigiimmi ingasalluinnartumik aqunneqarmata.

Taamatut oqaaseqarluta siunnersuut taperserparput innersuullugulu Sanaartornermut Ataatsimiititaliamut.